



Lecziun 28 – Modul F

Il conjunctiv (preschent)

Rait didactica		Capacitads linguistics					
Livels linguistics		Cuntegn dal text					
		Cuntegn dal pled					
		Furma da la frasa					
		Furma dal pled					
		Segn e sun					
		Musica					
		Diever					

Accent da la lecziun

Vegn era tractà



TGE

Cuntegn

- Il conjunctiv (preschent)



PER TGE

Finamira

- PDCs taidlan in text e respundan en scrit a dumondas da chapientscha.
- PDCs san furmar il conjunctiv ed al applitgar correctamain en scrit.



CUN TGE

Material existent

- Xena Ruinatscha, Crimis da Manfred Veraguth, coediziun dal Radio Rumantsch e da la Lia Rumantscha, Cuira, 2005



Exercizi 1

Legia las dumondas sutvart. Taidla alura l'episoda da Xena Ruinatscha ,Il plaz striunà' e las respunda silsuenter en scrit. Correctura en il plenum.

1) Cura han lieu ils eveniments misterius?

2) Co sa cloma l'inserat che Baseli, il gidanter da la detectiva Xena, ha publictà en la gasetta?

3) Pertge è la racheta da Baseli magica e co sa cloma ella?

4) Cura e co svanescha la laina mintgamai?

5) Pertge èsi insumma vegnì uschè lunsch?

6) Tge fiss probablamain capità, sche l'emplojà communal n'avess betg clamà per agid Xena?



Exercizi 2

Cumplettescha las largias cun il verb en la parantesa!

I vegn ditg ...

... ch'el na _____ (dastgar) betg pli fimar per motivs da sanadad.

... ch'ins _____ (far) quai oz uschia.

... ch'ella _____ (avoir) dumandà, sch'ins _____ (stuair) vairamain lavurar adina.

... ch'ins _____ (vegnir) ad intervegnir la nova en ils proxims dis.

... che ti _____ (savair) raquintar uschè bain sgnoccas.

... che en quest'interpresa _____ (lavurar) ins savens enfin la saira tard.

... ch'els _____ (ir) la dumengia gugent in toc a spass.

... che gnanc en las vacanzas na _____ (pudair) ins adina far mo quai ch'ins _____ (vulair).

... che nus _____ (sentir) la primavaira quasi tut l'onn.

... che quai _____ (esser) modern, era sch'i na _____ (plaschair) forsa betg a mintgin.

... ch'il postin dal vitg vischinant _____ (leger) inqual giadas las cartas postalas da ses clients.

... che jau na _____ (duair) betg prender tut a cor.



Exercizi 3

Il plaz striunà

Ch'igl era prest il prim d'avust, hai jau remartgà, cura che Baseli ha clamà mai en ses biro. El stoppia mussar insatge, ed i pareva dad esser ina chaussa zunt interessanta, Baseli era numnadamain tut alterà.

Baseli: N'è quai betg fantastic?

Xena: Ma tge pomai è fantastic?

Baseli: Là, sin maisa, sa chatta mia racheta dal prim d'avust! Igl è il model X4-C5, ins numna questa racheta era la racheta Harry Potter, perquai ch'ella è magica!

Xena: Ti laschas ir rachetas il prim d'avust? Quai n'avess jau betg pensà da tai!

Baseli: Na, atgnamain na lasch jau betg ir rachetas, ma jau n'hai betg pudì resister da cumprar la racheta Harry Potter.

Baseli ha anc raquintà in quart d'ura da questa racheta magica – magica, perquai che mintgina saja autra, ed en mintga cas sensaziunala. Rachetas n'interessavan betg mai, ma jau hai tuttina tadlà las paraulas da Baseli ... jau n'aveva nagut auter da far. Era detectivas sentan il temp da vacanzas.

I n'è dentant stà nagut cun ir a far bogn il suentermezdi. In emploià communal ha telefonà, el duvrava mes agid. I n'ha dà nagut auter che da ma metter sin via en direcziun d'in bajetg grisch, enstagl da pudair far bogn en l'aua frestga.

Client: Sco che Vus savais forsa avain nus mintg'onn in bel fiu dal prim d'avust - e quai vulain nus era porscher quest onn. E jau hai legì Voss inserat: Es fin culiez en la buatscha, cloma Xena Ruinatscha ...

Xena: Gea, gea, quai ha mes collega, quest sterl, publitgà en la gasetta. Co poss jau gidar? Jau sun detectiva e betg lavurera da gaud!

Client: Nus duvrain era Voss servetschs da detectiva. Nossa laina per il fiu dal prim d'avust svanescha adina!

Xena: Laina che svanescha è propi laina extraordinaria!

Client: Trais giadas avain nus ussa gia fatg in bel mantun en il lieu nua ch'il fiu duai arder - mo l'auter di è la laina mintgamai svanida. Noss lavurer communal ha observà tut duas giadas, ed el ha ditg che la laina svaneschia simplamain uschia – quest plaz è striunà! Nagin na ristga pli da s'avischinar al lieu!

Mes client pareva da crair ch'il plaz saja striunà. Ma jau era persuadida ch'i deva in'autra explicaziun che magia: insatgi stueva engular la laina.



Grammatica 1

Il conjunctiv (preschent)

Las **furmas dal conjunctiv** enconusch'ins vi dal fatg, ch'ellas cuntegnan en tut las desinenzas da tut ils temps in *-i-* tar ils verbs regulars.

jau *gidja*, ti *gidjas*, el *gidja*, nus *gidjan*, vus *gidjas*, els *gidjan*

jau *vendja*, ti *vendjas*, el *vendja*, nus *vendjan*, vus *vendjas*, els *vendjan*



Il **conjunctiv preschent** vegn furmà cun il tschep dal conjunctiv ch'è identic cun il tschep da la 1.-3. sg. ind. dals verbs regulars. Latiers vegnan il segn modal *-i-* e las desinenzas ch'èn per part differentas da quellas da l'indicativ preschent (1. sg.: *jau gid - che jau gidja*; 1./2. pl. *nus gidain - che nus gidjan*; *vus gidais - che vus gidias*). La furmazion è damai: tschep dal conjunctiv + segn modal + desinenza = *gid + i + -a, -as, -a, -an, -as, -an*.

conj. prs.	1. conjugaziun	2. conjugaziun	3. conjugaziun	4. conjugaziun
	<i>gidar</i>	<i>temair</i>	<i>vender</i>	<i>partir</i>
<i>che jau</i>	<i>gidja</i>	<i>temia</i>	<i>vendja</i>	<i>partia</i>
<i>che ti</i>	<i>gidjas</i>	<i>temias</i>	<i>vendias</i>	<i>partias</i>
<i>ch'el/ella</i>	<i>gidja</i>	<i>temia</i>	<i>vendja</i>	<i>partia</i>
<i>che nus</i>	<i>gidjan</i>	<i>temian</i>	<i>vendian</i>	<i>partian</i>
<i>che vus</i>	<i>gidjas</i>	<i>temias</i>	<i>vendias</i>	<i>partias</i>
<i>ch'els/ellas</i>	<i>gidjan</i>	<i>temian</i>	<i>vendian</i>	<i>partian</i>

La conjugaziun è identica en tut las classas. L'accent è adina sin il tschep. Ils verbs alternants preschentan damai en il conjunctiv la varianta accentuada dal tschep (p.ex. *putâr - che jau pôrtia*), ed ils conjunctivs dals verbs cun infix la furma cun *-esch-* (p.ex. *gratulâr - che jau gratuléschia*).

Il **conjunctiv** vegn duvrà en emprima lingia en proposiziuns subordinadas ed è dependent dal verb da la proposiziun principala u dad auters plects ch'al precedan.

Jau crai ch'els chantian bain.

Ella ha ditg ch'els giajan damaun en vacanzas.

El è partì senza che jau sappia.

En proposiziuns principalas è il conjunctiv fitg rar. Là po el vegnir duvrà per exprimer giavischs u intimaziuns.

Tia veglia daventia.

Ins veglia respectar la zona da silenzi!

Las furmas dal **conjunctiv perfect** expriman l'antieritad da la proposiziun subordinada envers la proposiziun principala.

El manegia che ti hajas sunà stupent.

El ha ditg che ti sajas stà da giuven in onn en l'America.



Il pli savens vegn il conjunctiv duvrà en il **discurs indirect**.

Ella ha ditg ch'els giajan damaun en vacanzas.

En il discurs indirect ston ins savens era adattar las personas ed ils pronoms a la nova perspectiva.

- discurs direct:

Ella ha ditg: "Jau vom pli gugent cun skis."

Il bab ha ditg: "Ti has da far l'emprim ils pensums."

- discurs indirect:

Ella aveva ditg ch'ella giaja pli gugent cun skis.

Il bab ha ditg che jau haja da far l'emprim ils pensums.

Dumondas e cumonds han ina furma speziala en il discurs indirect:

dumondas

- discurs direct:

Ella ha dumandà: "Vulais era in biscuit?"

Il scolast ha dumandà: "Tgi vul cumenzar?"

- discurs indirect (cun *sche* u in *pled interrogativ + che*):

Ella ha dumandà, sche nus veglian era in biscuit.

Il scolast ha dumandà, tgi che veglia cumenzar.

Dumondas indirectas che vegnan introducidas d'ina conjuncziun:

sche Jau na sai betg, sch'el vegn.

co che Jau na sai betg, co ch'el ha num.

quant che Jau na sai betg, quant ch'el gudogna.

cura che Jau na sai betg, cura ch'el vegn.

nua che Jau na sai betg, nua ch'ella va.

pertge che Jau na sai betg, pertge ch'el è qua.

cumonds

- discurs direct:

La mamma ha ditg: "Va vi tar l'onda Nesa cun quest satget!"

- discurs indirect (cun il conjunctiv preschent dal verb modal *duair + infinitiv* u, pli frequent, simplamain cun *da + infinitiv*):

La mamma ha ditg che jau duaja ir vi tar l'onda Nesa cun quest satget.

La mamma ha ditg dad ir vi tar l'onda Nesa cun quest satget.



Il pronom indefinit 'ins' suenter il verb

Verbs auxiliars e modals

conjunctiv

avant il verb	suenten il verb
<i>ins haja</i>	<i>haja<u>n</u> ins</i>
<i>ins saja</i>	<i>saja<u>n</u> ins</i>
<i>ins duaja</i>	<i>duaja<u>n</u> ins</i>
<i>ins possia</i>	<i>possia<u>n</u> ins</i>
<i>ins sappia</i>	<i>sappia<u>n</u> ins</i>
<i>ins stoppia</i>	<i>stoppia<u>n</u> ins</i>
<i>ins giaja</i>	<i>giajan ins</i>
<i>ins vegnia</i>	<i>vegnia<u>n</u> ins</i>
<i>ins veglia</i>	<i>veglia<u>n</u> ins</i>

Il pronom indefinit 'i/igl' suenter il verb

Verbs auxiliars e modals

conjunctiv

avant il verb	suenten il verb
<i>igl haja</i>	<i>haja</i>
<i>i saja</i>	<i>saja</i>
<i>i duaja</i>	<i>duaja</i>
<i>i possia</i>	<i>possia</i>
<i>i sappia</i>	<i>sappia</i>
<i>i stoppia</i>	<i>stoppia</i>
<i>i giaja</i>	<i>giaja</i>
<i>i vegnia</i>	<i>vegnia</i>
<i>i veglia</i>	<i>veglia</i>

Remartga:

Il pronom *i/igl* croda adina en il conjunctiv suenter il verb. Sch'i vegn duvrà in pronom en questa successiun, pon ins duvrar il pronom *quai*: *haja quai, saja quai, dettia quai* euv.



Soluziun, Exercizi 1

Legia las dumondas sutvart. Taidla alura l'episoda da Xena Ruinatscha ,Il plaz striunà' e las respunda silsunter en scrit. Correctura en il plenum.

1) Cura han lieu ils eveniments misterius?

Ils eveniments misterius han lieu curt avant il prim d'avust.

2) Co sa cloma l'inserat che Baseli, il gidanter da la detectiva Xena, ha publictà en la gasetta?

Es fin culiez en la buatscha, cloma Xena Ruinatscha.

3) Pertge è magica la racheta da Baseli e co sa cloma ella?

La racheta Harry Potter, il model X4-C5, è magica perquai che mintgina è autra.

4) Cura e co svanescha la laina mintgamai?

La laina svanescha mintgamai la notg, perquai ch'ils dus lavurers che la mantunan la damaun allontaneschan ella mintgamai cura ch'igl è stgir.

5) Pertge èsi insumma vegnì uschè lunsch?

Ils lavurers abitan gist sper il plaz, nua ch'i vegn festivà onn per onn il prim d'avust. Perquai ch'els na pudevan betg pli supportar la canera, oravant tut betg quella da las rachetas che vegniva mintg'onn pli e pli gronda, vulevan els ch'il fiu dal prim d'avust vegnia fatg en in auter lieu.

6) Tge fiss probablmain capità, sche l'emplojà communal n'avess betg clamà per agid Xena?

Ils responsabels avessan probablmain cartì als lavurers ch'il plaz saja striunà, avessan tschertgà in auter lieu per far il fiu dal prim d'avust ed ils dus lavurers avessan cuntanschì lur finamira.



Soluziun, Exercizi 2

Cumplettescha las largias cun il verb en la parantesa!

I vegn ditg ...

... ch'el na **dastgia** (dastgar) betg pli fimar per motivs da sanadad.

... ch'ins **fetschia** (far) quai oz uschia.

... ch'ella **haja** (avoir) dumandà, sch'ins **stoppia** (stuair) vairamain lavurar adina.

... ch'ins **vegnia** (vegnir) ad intervegnir la nova en ils proxims dis.

... che ti **sappias** (savair) raquintar uschè bain sgnoccas.

... che en quest'interpresa **lavurian** (lavurar) ins savens enfin la saira tard.

... ch'els **giajan** (ir) la dumengia gugent in toc a spass.

... che gnanc en las vacanzas na **possian** (pudair) ins adina far mo quai ch'ins **veglia** (vulair).

... che nus **sentian** (sentir) la primavaira quasi tut l'onn.

... che quai **saja** (esser) modern, era sch'i na **plaschia** (plaschair) forsa betg a mintgin.

... ch'il postin dal vitg vischinant **legia** (leger) inqual giadas las cartas postalas da ses clients.

... che jau na **duaja** (duair) betg prender tut a cor.



Soluziun, Exercizi 3 (proposta)

Metta las lingias grassas en il discurs indirect. Schlia l'exercizi en scrit ed al curregia alura en il plenum.

Baseli dumonda Xena, sche quai na **saja** betg fantastic.

Xena dumonda alura Baseli, tge che **saja** pomai fantastic.

Baseli respunda che là sin maisa **sa chattia** sia racheta dal prim d'avust, ch'i **saja** il model X4-C5 e ch'ins **numnia** questa racheta era la racheta Harry Potter, perquai ch'ella **saja** magica!

Xena constatescha tut surstada che Baseli **laschia** ir rachetas il prim d'avust e ch'ella n'**avessi** betg pensà quai dad el!

Baseli la respunda ch'el na **laschia** atgnamain betg ir rachetas, ma ch'el n'**haja** betg pudì resister da cumprar la racheta Harry Potter.

Il client ha ditg a Xena che, sco quai ch'ella **sappia** forsa, **hajan** els mintg'onn in bel fiu dal prim d'avust - e ch'els **veglian** era porscher quai quest onn e ch'el **haja** legì ses inserat che **dia** che sch'ins **saja** fin culiez en la buatscha, **duajan** ins clamar Xena Ruinatscha...

Xena ha ditg gea, gea, che ses collega, quest sterl, **haja** publitgà quai en la gasetta. Alura ha ella dumandà co ch'ella **possia** gidar, ch'ella **saja** la finala detectiva e betg lavurera da gaud!

Il client l'ha ditg ch'els **dovrian** era ses servetschs da detectiva, (perquai) che lur laina per il fiu dal prim d'avust **svaneschia** adina!

Xena ha ditg che laina che **svaneschia saja** propi laina extraordinaria!

Il client ha raquintà ch'els **hajan** ussa gia fatg trais giadas in bel mantun en il lieu nua ch'il fiu **duaja** arder – mo che l'auter di **saja** la laina mintgamai svanida, che lur lavurer communal **haja** observà tut duas giadas, e ch'el **haja** ditg che la laina **svaneschia** simplamain uschia – che quest plaz **saja** striunà e che nagin na **ristgia** pli da s'avischinar al lieu!